

NAQQIUT

(Siunnersuuteqartoq allanngorpoq)

16. april 2019

UPA2019/194

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara.

Nunatsinni nioqqutissat akiisa OECD-imi inuussutissat ulluinnarni atorneqakkajuttut naliginnaasumik akiisa agguaqatigiisinnerinut naleqqiullugu nunatsinni qaffasippallaarujussuarnerisa sumik tunngaveqarnersut misissueqqullugit naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuineq UKA2020-imi nallertinnagu inatsisartunut saqqummiunneqassaaq.

(Inatsisartunut Siumup gruppiani ilaasortat).

Tunngavilersuut:

Qinersineq sioqqullugu 2017-mi ukiaanerani ataatsimiinnermi inatsisartunut ilaasortat ilaata siunnersuutaa iluatinnarluinnartoq matumuuna assingusunngorlugu qaqeqqippara. Nunatsinni nioqqutissat akiisa akuersaarneqarsinnaanngitsumik qaffasippallaarujussuarnerat, taamatuttaarlu nunatta iluani inoqarfiit allaat imminnut qanikkaluartulluunniit eqqarsaatigalugit ilaqutariinnullu aningaasaqarnikkut ilungersunareeqisumi sulii artukkiinerulersitsisimanerat ullutsinnut naapertuutinnigilaq.

Agguaqatigiisillugu EU-mi atuisartumut akeq kifartuusseriaaserlu 100-miikkaagat, akikinnerpaaffiani Bulgariami 48-rusarpoq Danmarkimilu 138-sarluni – imatut paasillugu: Assersuutigalugu Bulgariami atuisartumut nioqqutissaq 48 koruuneqaraangat Danmarkimi nioqqutissaq taanna 138 koruuneqartarpoq.

Tassa imaappoq nioqqutissaq taannarpiaq pingasoriaatingajammik Bulgariami Danmarkimiit (EU-p iluani) akikinneruvoq.

Nunatta niueqateqarnerata akikinninngorujussuarlugu allanngortinneratigit, akissarsiat/utoqqalinersiutit/ilinniarnersiutit qaffanngikkaluarlugit pisiniutigisinnaaneri 30-40%imik qaffassinnaangaluarpagut, tassuunalu aamma atugarissaarnerulerneq aqqutissiuullugu.

Inuiaqatigiillu suliffeqarfinnik piginnittutut inissisimanerat iluaqutsiullugu nunanut allanut sanilliulluta iluarseeriarnissamut periarfissaginnerpaajulluta sulii taamannak alloriannigilugut.

Nalunngilarput akissarsiat qaffannerisa aningaasat nalikinnerulerneranik aammalu unammillernermi ajornerulersitsisartuq. Niueqateqariaasittali nunanut allanut akikinnerusunut allanngortilaarneratigit, sulisartukkormiuugutta, utoqqalinersiuteqarutta ilinniarnermusiaqaraluaruttaluunniit, taakku pisartagaasa qaffasissusaat nikisinngiivillugu pisisinnaassuseqarnerat 30-40% tungaanut annertusisinnaavarput. Utoqqatsissusissarsiorneq

aporfissarsiorneq piffissaanngilaq, qinikkatununa atugarissaarnerulersitsinissamik aqqtissiuisussaasugut, killormuunngitsoq.

Taamaattumik kissaatigaara nunatsinni nioqqutissat akiisa qaffasinnerujussuata misissorneqarnissaanik, taamaasilluta politikikkut akit appasinnerusut ujartorsinnaajumallugit.

Taamaattumillu Naalackersuisut piaartumik misissuinissaannik peqqullugit siunnersuuteqarpunga neriuutingalugu ilassilluarneqassasoq.

Allaffissornikkut aningaasatigullu pisortanut kingunerisinnaasai:

Naatsorsuutigineqarpoq misissueqqissaarnerup suliarinera katillugu sulisup ataatsip AC-tut atorfillip ukiumut sulineranut naatsorsuut aallaavigalugu, ukiup ataatsip affallu missaani suliarineqarsinnaassasoq, tamannalu 750.000 kruuninik naleqassaaq. Tassunga ilaatinneqarput suliamik nutserinerit il. il. Tassungalu ilanngullugu naatsorsuutigineqassaaq misissueqqissaarnermi allaffissornertigut piffissamik atuisoqarnerunissaa, sammisap imaanut tunngatillugu ilisimasallit avataaneersut isumasioqatigisarnissaat pisariaqartinneqassagami. Tamatumunnga atatillugu saneqqunneqarsinnaassanngilaq sammisamut tunngatillugu immikkut ilisimasallit ilisimasanik immikkuullarissunik pisariaqartitanik aallerfigisarnissaat, tamannalu allaffissornertigut aningaasartuuteqarnermik kinguneqassalluni.

Allaffissornikkut aningaasatigullu namminersortunut kingunerisinnaasai:

Siunnersuut namminersortunut aningaasatigut sunniuteqassanngilaq.

Allaffissornikkut aningaasatigullu innuttaasunut kingunerisinnaasai:

Siunnersuut innuttaasunut aningaasatigut sunniuteqassanngilaq